

PENUH SEMANGAT---Sekitar Majlis Sambutan Ambang Merdeka

UUM ONLINE: Perjuangan mempertahankan negara bukan sekadar untuk generasi dan jangka hayat kita sahaja, tetapi perjuangan kita sebenarnya adalah untuk mewariskan sebuah negara yang kuat kepada generasi akan datang, kata Naib Canselor Universiti Utara Malaysia (UUM), Prof. Dr. Mohamed Mustafa Ishak.

Oleh itu, pengisian tentang erti kemerdekaan sangat penting untuk dikongsi bersama generasi masa kini supaya mereka dapat mewarisi semangat perjuangan tokoh silam yang telah memerdekakan negara kita daripada cengkaman penjajah.

"Kemerdekaan yang kita miliki hari ini adalah hasil usaha kuat pejuang terdahulu yang tidak pernah gentar untuk mempertahankan maruah tanah air tercinta demi mencapai kemerdekaan negara yang mampu bertahan sehingga ke hari ini.

"Apa sumbangan yang akan diwariskan kepada generasi akan datang. Adakah negara yang porak peranda atau negara yang penuh dengan gejala sosial dan negara yang generasinya berakhlak binasa.

"Persoalan itu menyebabkan kita tidak boleh membiarkan negara kita lemah dan hilang kekuatan di samping memikirkan bagaimana caranya menyusun strategi sekali gus mengambil langkah-langkah membina negara yang gagah perkasa dan semakin merdeka dari pelbagai aspek," katanya.

Katanya, inilah yang harus disemaikan setiap kali menyambut kemerdekaan kerana merdeka itu melonjakkan diri daripada satu tahap ke tahap yang lain.

Beliau berkata demikian pada Majlis Sambutan Ambang Merdeka Peringkat IPT Zon Utara yang berlangsung di perkarangan Masjid Sultan Badlishah, UUM anjuran Kementerian Pengajian Tinggi dengan kerjasama Jabatan Hal Ehwal Pelajar.

Selain itu, Mustafa berkata, walaupun sambutan dan tempat lokasi sambutan hari kemerdekaan di peringkat UUM agak berlainan sedikit berbanding tahun-tahun lalu tetapi hal ini sedikitpun tidak memadam dan mengurangkan semangat seluruh warga UUM untuk menyambutnya.

Beliau juga turut mencadangkan agar perancangan untuk menyambut hari kemerdekaan ini perlu dilakukan lebih awal agar dapat memupuk semangat sambutan kemerdekaan dalam kalangan setiap staf dan pelajar di universiti ini.

Antaranya, memulakan dengan perarakan obor merdeka dari satu jabatan ke jabatan yang lain, memasang Jalur Gemilang atau mengadakan program tertentu sehingga semangat menyambut kemerdekaan itu dapat dirasai oleh semua pihak.

Katanya, memahami pengertian tentang erti kemerdekaan dan mengingatnya adalah lebih penting, kerana kemerdekaan yang dimiliki pada hari ini sangat bermakna dan besar ertinya kepada bangsa dan negara.

Justeru, katanya lagi, kemerdekaan yang telah diperoleh hari ini, haruslah dijaga dengan sebaik-baiknya dengan mengisi dan meneruskan perjuangan kemerdekaan.

"Sayangkan negara sebahagian daripada iman, kerana jika negara sudah tiada atau musnah, maka tidak mungkin kita dapat meneruskan kehidupan sebagai umat yang merdeka dan berdaulat," katanya.

Habis.